



ANG

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 10
Mayo 21, 2010
www.philippinerevolution.net

Editorial

Mga sigaw ng bayan ang isasalubong sa uupong rehimeng Aquino

Lumalabas na ang susunod na mamumuno ng neokolonyal na estado sa Pilipinas ay si Benigno “Noy” Aquino III, batay sa paunang resulta ng nagdaang reaksyunaryong eleksyon.

Oras na umupo si Aquino sa Hunyo 30, determinado ang mamamayang Pilipino na itulak ang paglutas sa mga saligang pampulitika at sosyo-ekonomikong usaping matagal na nilang pinagdurusahan sa ilalim ng bulok na malakolonyal at malapyudal na sistema.

Numero Unong sigaw ng mamamayang Pilipino ang paglilitis at pagpaparusa kay Gloria Arroyo at kanyang mga kasapakat sa lahat ng kanilang krimen habang nasa poder.

Katarungan ang sigaw nila sa napakaraming kaso ng pagnanakaw, kabilang ang ilang bilyong pisong suhol sa proyektong ZTE-National Broadband Network, proyektong IMPSA-Caliraya, proyektong Diosdado Macapagal Boulevard, panggagantso sa Fertilizer Fund at Swine Fund at iba pang kaso ng malakihang pandarambong.

Iginigiit nila ang kataru-

ngan at kabayaran sa napakaraming krimen sa sangkatauhan at paglabag sa karapatang-tao sa pagpapatupad ng Oplan Bantay Laya 1 at 2. Hustisya ang sigaw ng mga tagapagtanggol ng karapatang-tao at mga pamilya, kaibigan at tagasuporta ng higit sanlibong biktima ng ekstrahudisyal na pamamaslang, libu-libo pang iligal na inaresto, tinortyur at ikinulong, dinukot at naging desaparesido;



Mga tampok sa isyung ito...

Ang kumukulong labanang Arroyo-Aquino
PAHINA 3

Meyor, 4 na eskort, pinalaya
PAHINA 7

Ilitaw si Embati --BHB-FSMR
PAHINA 8

at ilang milyong biktima ng pwersahang pagpapalikas, pagnanakaw, panununog at pagwasak ng kani- lang mga bahay at bukid sa kamay ng mga pasistang tropa ni Arroyo.

Nais ng mamamayan na pagba- yaran ni Arroyo ang paglapasta- ngan niya sa pambansang kasarín- lan sa pagpapatupad ng mga pata- karan ng imperyalistang neolibera- lismo na dikta ng US. Katarungan ang sigaw nila sa pagbubukas ng mga lupain at likas na yaman ng bansa sa pandarambong ng mga dayuhang korporasyon, sa pagbibig- gay-daan sa panghihimasok at per- manenteng presensya ng mga pwersang militar ng US. Sisingilin nila ang pagpapalaya kay Daniel Smith, sundalong Amerikano na nahatulang gumahasa kay Nicole noong 2004.

Buong-buong kukundenahin ng bayan ang anumang pag-uurong- sulong ni Aquino sa pagtugis, pag- aresto, paglilitis at pagparusa kay Arroyo at kanyang mga kasapakat sa harap ng patuloy na pagmamati- gas at pagmamaniobra ng mga ito.

Samantala, sa napipintong pag- hawak naman ni Aquino sa eheku- tibong sangay ng reaksiyong guberno ay dudulas ang pagbaba-

lik sa poder ng angkang asendero ng mga Aquino-Cojuangco. Babag- bagin ang kanyang rehimen ng si- gaw ng masang magbubukid para sa tunay na reporma sa lupa, kabi- lang ang pagbasura sa huwad na *stock distribution option*, ang kag- yat na pamamahagi sa malalawak na lupain ng mga Cojuangco at ang paggagawad ng katarungan sa mga biktima ng masaker sa Hacienda Luisita.

Nagpupumilit ang mga Aquino- Cojuangco na patuloy na hawakan ang Hacienda Luisita habang inii- wasan naman ni Aquino ang isyu ng tunay na reporma sa lupa. Sad- yang tatampok sa kanyang pagka- pangulo ang pagsulong sa buong kapuluan ng rebolusyonaryong pa- kikibaka para sa tunay na reporma sa lupa at pagpapalaya ng mga magsasaka mula sa pyudal na pang- aapi.

Nasa likod ni Aquino ang mga dayuhang negosyante, malalaking panginoong maylupa, malalaking kumprador, ang pamilyang Aquino- Cojuangco (ang tinaguriang “Ka- mag-anak Incorporated”) at ang mga huwad na repormista. Sila ay pawang mga tagapagtaguyod ng mga patakarang neokolonyal, pyu-

dal at elitista. Ngayon pa man, di pa man sila nakauupo, ay maigting na ang mga kontradiksyon sa hanay ng iba't ibang paksyon sa kampo ni Aquino na nag-uunahan sa pangi- ngibabaw sa kapangyarihan, sa pagkakatas sa kabang yaman at sa pagsasamantala sa mamamayan.

Sa harap ng lahat ng ito, deter- minado ang mamamayang Pilipino na igiit sa bagong presidente ang pagwawakas at pagbawi sa mga pa- takarang neoliberal na dikta ng IMF na masugid na ipinatupad ng rehi- meng US-Arroyo at mga naunang rehimen. Iginigiit nila ang paghin- to sa paglalaan ng malalawak na lupaing agrikultural at sa likas na yaman ng bansa para dambungin at wasakin ng mga korporasyong im- peryalista, malalaking kumprador at burukratang kapitalista.

Sigaw nila ang pagtatayo ng tunay na mga industriyang pam- bansa sa halip na mga malamanu- paktura, mga *export processing zone*, at mga *outsourcing center*. Isinisigaw nila ang pagwawakas sa patakarang pag-eeksport ng mang- gagawa, ang paglikha ng solidong empleyo sa halip na kaswal at kon- traktwal, at ang garantiya ng ma- katarungan at makabuluhang pag- tataas ng sahod upang kahit pa- ano'y makahabol sa pagsirit ng gastos sa pamumuhay. Ang nagpa- patuloy at lumalalang internasyu- nal at lokal na krisis ay nagtutulak sa masang Pilipinong anakpawis at mamamayang nagdurusa na bag- tasin ang landas ng militanteng pakikibaka.

Igigiit din kay Aquino ang mga patriyotikong kahilingan ng pag- wawakas sa permanenteng presen- sya ng mga tropang Amerikano sa Pilipinas at sa mga di pantay na kasunduan sa US. Sigaw ng mga patriyotikong pwersa at mamama- yan ang pagwawakas sa panghihi- masok ng mga tropang US sa inter- nal na mga usaping militar sa ban- sa, kabilang ang papel ng militar



Taon XLI Blg. 10 Mayo 21, 2010

Ang *Ang Bayan* ay inilalabas sa wikang Pilipino, Bisaya, Iloko, Hili- gaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

www.philippinerevolution.net

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikau- unlad ng ating pahayagan. Maaabot kami sa pamamagitan ng email sa: angbayan@yahoo.com

Nilalaman

Editorial

Sigaw ng bayan, sasalubong kay Aquino	1
Kumukulong labanang Arroyo-Aquino	3
“Electronic Garci”	4
Bulok ang halalang Mayo 10	5
WANTED	6

Matatagumpay na TO

Meyor, apat na eskort, pinalaya ng BHB	7
4 na sundalo, inaresto sa ComVal	7
Mga gwardya, dinisarmahan	7
Kasinungalingan ng AFP, pinabulaanan	8

Pananalanta ng pasistang estado

Ilitaw si Embati	8
Pamamaslang sa Abra, pinagtatakan	8
Welga sa Triumph, binuwag	9
Brodkaster, tinangkang patayin	9

Balita	10
---------------	-----------

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

ng US sa pagdidisenyo at pagpapalano ng mga kampanyang panunupil ng AFP laban sa mga anti-imperyalista, progresibo at demokratikong pwersa.

Patuloy ang interes ng US sa pagpapatatag ng naghaharing sistemang pampulitika at estadong neokolonyal upang sa gayo'y matiyak at mapanatiling madulas ang pangmatagalang pang-ekonomya, pampulitika at pangmilitar na interes nito sa Pilipinas. Puspusing itinulak ng US sina Arroyo at mga karibal nito sa naghaharing uri na pagmukhaing malinis at kapanipaniwala ang katatapos na reaksyunaryong eleksyon upang pahupain ang mga kontradiksyon sa hanay ng magkakaribal na paksyon sa reaksyunaryong naghaharing uri.

Gayunman, patuloy na umiigting ang mga kontradiksyon at karamihan sa hanay ng magkakaribal na reaksyunaryong paksyon dahil sa lumalalim na krisis sa ekonomya, lumiliit na mapaghahatiang rekurso ng estado at humihigpit nilang tunggalian sa pulitika. Patuloy na lalalim at titindi ang krisis ng naghaharing sistemang pampulitika habang tinatangka ni Aquino na gumamit ng kapangyarihan at patuloy namang nagpapakana si Arroyo para panatilihin ang sarili sa poder at umiwas sa paglilitis at kaparusahan.

Patuloy na yayanigin ang papet na reaksyunaryong estado ng mga kontradiksyon sa hanay ng mga naghaharing uri at ng pag-igting ng mga pakikibaka ng mamamayan.

Ang mga rebolusyonaryong pwersa ay nahaharap sa napakainam na pagkakataon para paigtingin ang rebolusyonaryong pakikibaka. Determinado silang sumulong sa landas ng digmang bayan at isulong ang pambansa at demokratikong mithiin ng mamamayang Pilipino. AB

Ang kumukulong labanang Arroyo-Aquino

Habang nakatuon ang reaksyunaryong paksyon nina Benigno Aquino III sa pag-upo sa Malacañang sa katapusan ng Hunyo, patuloy ang pagmamaniobra ng pangkating Arroyo upang tiyakin na mapananatili ang malaki-laking bahagi ng kapangyarihan ng estado sa kanilang kamay. Layon nilang muling hawakan nang lubusan ang poder ng estado kalaunan. Kung hindi makagagawa ng mapagpasayang hakbangin ang kampong Aquino, magiging madaling target ng mga pakana nina Arroyo ang uupong presidente.

Sa kasalukuyan, nananatiling buhay ang banta ng pagpapalawig ni Arroyo sa kanyang kapangyarihan. Nakahanda pa rin siyang sagpangin ang anumang kaguluhang maaaring sumiklab sa isasagawang pagbibilang ng Kongreso sa mga boto ng presidente at bise presidente. Gamit pa rin ang mga kasapakat ni Arroyo sa kasalukuyang Kongreso, maaari nilang ituton ang takbo ng bilangan sa paglalantad at imbestigasyon ng mga dayaan para makwestyon ang pananalo ni Aquino at iba pang kandidato sa mga pambansang pwesto.

Kaalinsabay, tuluy-tuloy ang takbo ng mga tusong iskema ni Arroyo para makapangyari sa Kongreso at agawin ang pusisyon ng Speaker sa malao't madali. Mayron nang hawak si Arroyo na mahigit 100 kongresista bukod pa sa mga kaalyadong pinatakbo niya sa eleksyon sa *party-list*. Gagamitin ni Arroyo ang bilyun-bilyong pisong pondong kinamal niya sa pandarambong para hawakan ang mga kongresista. Dahil din sa probisyon sa badyet ngayong taon kung saan inilipat na sa Speaker mula sa presidente ang kapangyarihang ilabas ang "*pork barrel*" ng mga kongresista, mahihirapan si Aquino na gamitin ito para bil-

hin ang mga kongresista tulad ng ginawa ni Arroyo nitong nakaraang siyam na taon.

Kung masusunod ang plano ni Arroyo na maupo bilang Speaker, inaasahang unang-una niyang aatupagin ang pagtutulak ng pagbabago ng konstitusyon para bigyang-daan ang pag-upo niya bilang Punong Ministro sa ilalim ng sistemang parlamentaryo.

Matagal na ring napaghandaan ni Arroyo ang nakatakandang paglisan niya sa Malacañang. Tiniyak niya na ang sinumang mauupong presidente ay mapahihirapan sa lubusang paghawak ng kapangyarihan at sa pagpapanagot sa kanya. Noon pang Marso ay naiupo na niya bilang pinuno ng AFP si Gen. Delfin Bangit, matagal na niyang loyalista. Sa kabila ng matitinding pagtutol, itinuloy din niya ang paghirang noong nakaraang linggo kay Renato Corona bilang bagong punong mahistrado ng Korte Suprema.

Ang paghirang ni Arroyo sa ma-



tapat na tauhan niyang si Corona ang isa sa mga una niyang patibong na inilagtag para pahinain ang katayuan ni Aquino. Kung babanggain ni Aquino ang pagkakahirang kay Corona, maaari siyang akusahan nina Arroyo ng paglabag sa konstitusyon at ipailalim sa *impeachment*. Kapag tanggapin naman ni Aquino si Corona, asahang maraming mga kapasyahan ng Korte Suprema ang babangga sa mga aksyon ng Malacañang. Ang paghirang kay Corona ay isang hakbanging may

layuning uk-ukin ang kapangyarihan ni Aquino. Tiyak na marami pang ibang patibong ang ilalatag ni Arroyo sa hinaharap.

Ang masidhing tunggaliang Aquino-Arroyo ay salamin ng lalim at tindi ng tunggalian ng magkakaribal na paksyon ng naghaharing uri. Ang pagsidhi ng tunggaliang ito ay tiyak na hahantong sa lalo pang paglala ng krisis ng naghaharing sistemang pampulitika na dapat masamantala ng rebolusyonaryong kilusan. **AB**

"Electronic Garci"

Marami ang nagulat at namangha sa di inaasahang bilis ng pagbibilang ng mga resulta sa pinakaunang *automated* o de-kompyuter na eleksyon sa bansa. Pinuri iyon ng mga imperyalista at malalaking kumprador sa bansa. Napatahimik maging ang kampo ni Aquino na ilang beses na nagbanta ng pag-aalsang bayan kapag pumalya ang eleksyon.

Subalit makalipas ang ilang araw, lumalabas na ang mga ulat at impormasyon tungkol sa mga dayaan at iregularidad sa eleksyon, pati na ang mga kaso ng korapsyon sa loob ng Commission on Elections (COMELEC).

Maraming tanong ang naghahangnap ng kasagutan. Ilan sa mahigit 76,000 PCOS *machine* ang aktwal na nakapagpadala ng resulta ng botohan? Bakit may naitalang 153,902,003 botante, o tatlong ulit sa aktwal na nakarehistro, sa sentral na kompyuter ng COMELEC? Pinagpapaliwanag din si COMELEC Chairman Jose Melo kung bakit nagsimula na siyang magbasa ng mga resulta noong alas-6:30 ng gabi, samantalang alas-7:00 pa ng gabi ang pinakamaagang pagtatapos ng botohan sa mga presinto.


Malawak din ang mga pagdududa na ang pandaraya ay nakaprograma sa mismong *flash card* na siyang nagpapatakbo sa mga PCOS *machine*. Hindi pumayag ang COMELEC at ang Smartmatic, ang dayuhang pribadong kumpanyang inempleyo ng COMELEC, na ipasuri sa publiko ang programang nilalaman ng mga *flash card* na ito. Ilang araw bago ang eleksyon, lumabas na palyado ang mga makina sa

pagbibilang, kaya dali-daling pinalitan ng Smartmatic-TIM ang mga *flash card*. Iginigiit ng iba't ibang grupo na suriin ang mga dati at ipinalit na *flash card*, taliwas sa utos ni Melo na sirain na ang mga ito.

Lalong lumakas ang mga pagdududa sa *automated elections* nang may matagpuang 67 PCOS *machine* sa bahay ng isang teknisyen ng Smartmatic-TIM sa Antipolo. Ginawa lamang daw ng teknisyen ang trabaho niya na itabi ang mga makina, anang COMELEC at Smartmatic. Subalit naniniwala ang ibang kampo na ang mga makinang ito ay ginamit sa pagpapadala ng mga dinuktor na resulta ng eleksyon. Sa pagsusuri sa mga makina, nadiskubre na ang mga ito ay nagpadala ng mga "resulta" ng eleksyon mula Mayo 9 (isang araw bago ang halalan) hanggang Mayo 11. Marami pang ibang umangal sa pagkakaiba ng mga petsa ng pagbibilang at transmisyong mga bi-

lang sa COMELEC—ang iba'y noong Abril pa umano nagsimula. Hindi ito matinong maipaliwanag at sa halip ay minaliit pa ng Smartmatic-TIM.

Samantala, lumantad sa isang bidyo ang isang nakamaskarang lalaking nagpakilalang dating teknisyen ng COMELEC. Sangkot umano siya sa pagpapalit ng mga balota, paggamit ng ibang mga *flash card* kung saan nakaprograma na ang mga mananalong kandidato at *jamming* o pagbara sa elektronikong transmisyong sa



COMELEC ng mga resulta ng bilangan. Naba-wasan umano ng limang milyon ang mga boto ni Joseph Estrada, gayundin kina Gilbert Teodoro at Eddie Villanueva para maidagdag ito sa mga boto nina Noynoy Aquino at Jejomar Binay. Naghahanda naman ang kampo ni Estrada ng anito'y matitibay na patunay ng "hocus-PCOS."

Malawak din ang pagkakabahala sa pagkakadiskubre sa tambakan ng basura sa Cagayan de Oro ng saku-sakong mga *flash card*, balota at iba pang kagamitan sa eleksyon.

Ipinahayag naman ni dating Solicitor General Francisco Chavez

na kakasuhan niya ang mga upi-syal ng COMELEC dahil sa pagkaka-sangkot ng mga ito sa korapsyon at pandaraya. Ani Chavez, tanging si Commissioner Rene Sarmiento ang malinis sa COMELEC. Inilantad naman nina Melchor Magdamo, dating abugado ng COMELEC at Dr. Arwin Serrano, isang *coordinator* ng Parish Pastoral Council on Responsible Voting na nakatalaga sa COMELEC ang mga anomalya tulad ng sobra-sobrang pagpepresyo sa mga kagamitan sa eleksyon tulad ng mga *folder*, paggamit ng peke na *indelible ink* (tintang hindi nabubura) at pagbebenta ng mga “pagpapanalo” sa eleksyon.

Dahil hindi na maisaisantabi ang dami ng mga naiulat na anomalya, napilitan nang magpatawag ng imbestigasyon ang Mababang Kapulungan. Nitong Mayo 19 ay sinimulan na ni Rep. Teodoro Locsin Jr., tagapangulo ng Committee on Electoral Reforms and Suffrage ang mga pagdinig hinggil dito. Walang matinong maisagot ang mga kinatawan ng Smartmatic-TIM sa mga tanong na iniharap sa pagdinig, kabilang na ang mga kaduda-dudang petsa at oras ng transmisyon ng mga resulta at ang mga paraan upang matiyak kung peke o hindi ang mga *election return*.

Habang dumarami ang nabubunyag at napatutunayan tungkol sa “Electronic Garci,” lalong lumalaki ang duda kung naging malinis at kapani-paniwala nga ang nagdaang eleksyon.

Ang imbestigasyon ng Kongreso sa mga naglilitawang mga anomalya sa naganap na eleksyon ay sinasagpang ngayon ng mga tauhan ni Arroyo na namumuno sa Kongreso upang balamin at ibitin hanggang Hunyo 30 o hanggang sa kakayanin nila ang upi-syal na deklarasyon sa mga nanalo sa eleksyon para sa presidente at bise presidente. **AB**

Bulok ang halalang Mayo 10

Walang pinagkaiba sa esensya ang nagdaang eleksyon sa dating nang bulok na mga reaksyunaryong eleksyon. Patuloy na naghari ang dahas, salapi, panlilinlang at pandaraya. Mga bulok na pulitiko pa rin ang naluklok sa pwesto.

Pinaghaharian pa rin ng mga tuta ng imperyalismong US ang Malacañang at Kongreso. Nagpalit-palitan lamang ng mga pwesto ang dati nang mga tagapangasiwa ng malakolonyal at malapyudal na sistema sa bansa at tagapagtaguyod ng kanilang makauri at makasariling interes.

Pangunahin na rito ang panunumbalik ng angkanng Aquino-Cojuangco sa pinakamataas na pusisyon sa estado.

Isa ring tampok na halimbawa ang panunumbalik sa poder ng pamilya ng pasistang diktador na si Ferdinand Marcos. Nanalong kongresista ng Ilocos Norte ang byuda niyang si Imelda, samantalang nanalong gobernador doon ang panganay nilang si Imee. Nanalo namang senador ang isa pa nilang anak na si Ferdinand Jr. Matapos ang mahigit 20 taon mula nang ibagsak ang mga Marcos, patuloy silang namamayagpag sa pulitika habang patuloy na ipinagkakait ang katarungan sa libu-libong biktima ng pasistang diktadura.

Nasa poder pa rin ang pamilyang Arroyo. Mismong si Gloria Arroyo, ang dalawa niyang anak at kanyang bayaw ay uupo sa bagong Kongreso.

Sa Isabela, nakapanumbalik ang dinastiyang Dy gamit ang lanasakang pananakot, pamimili ng boto at garapalang pandaraya. Nanalong gobernador si Faustino Dy III bukod sa pito pa niyang kamaag-anak na nanalo ng iba't ibang pwesto sa Isabela. Sa Ilocos Sur, nanalong gobernador si Chavit Singson bukod sa 12 pa niyang kamaag-anak na nanalo sa iba't ibang pwesto. Sa Pampanga, nanalong

gubernurador si Lilia Pineda, kilalang nagpapatakbo ng hweteng at mahigpit na kaalyado ni Arroyo.

Sa Senado, pawang mga lumang pangalan sa reaksyunaryong pulitika at mga artista ang muling uupo at inaasahang magpapatuloy sa dati nang kinagisnang palakad at patakarang pabor sa bulok na naghaharing sistema.

Samantala, lalo pang hinigpit ang mga progresibong kandidato at partido na lumahok sa eleksyon. Tuwirang nangampanya ang mga sundalo ng AFP upang si-raan ang mga ito, pagtatanggalin ang mga poster nila at takutin ang mamamayang boboto sa mga ito. Sa kabila nito, may ilan pa ring mga progresibong partido na inaasahang makauupo sa Kongreso.

Kaalinsabay nito, todo-todong sinalaula ng mga naghaharing uri ang sistemang *party-list*, na may layon umanong magkaroon ng mga kinatawan ang mga agrabyadong sektor sa Kongreso. Kabi-kabila ang mga grupo sa *party-list* na itinayo o ginamit ng pangkating Arroyo at iba pang mayayaman at makapangyarihan para maipanalang ang kanilang mga tauhan. Mismong si Mikey na panganay ng mga Arroyo ay makauupo bilang kongresistang kakatawan umano ng mga *security guard*.

Ang resulta ng nagdaang eleksyon ay nagpapatunay na ito'y nagsisilbi lamang para panatilihin at bigyan ng panibagong bihis ang umiiral na bulok na sistema sa bansa. Sa katuus-tuusan, rebolusyon ang pinakamaasahan ng mamamayan para sa tunay na saligan at tuluy-tuloy na mga pagbabago. **AB**

WANTED



GLORIA MACAPAGAL-ARROYO

- TUTA NG KANO** Pinahintulutan ang permanenteng presensya ng mahigit 600 tropang Amerikano sa Zamboanga. Pinalaya si Daniel Smith, sundalong Amerikano na nangghasa sa isang Pilipina.
- TAKSIL SA BAYAN** Nagpatupad ng pinakamasasahol na maka-imperyalis-tang patakaran ng liberalisasyon, pribatisasyon at deregulasyon na lalong nagpahirap sa mamamayan.
- MAMAMATAY-TAO** Nagpatupad ng Oplan Bantay Laya 1 at 2 na nagtulak ng malawakang pamamaslang, pagdukot, tortyur at iba pang paglabag sa karapatang-tao.
- MANDARAYA** Naluklok sa Malacañang sa pamamagitan ng malawakang pandarayang nabun-yag sa iskandalong "Hello Garci." Walang tigil na nangampanya para baguhin ang konstitusyon para palawigin ang kanyang termino.
- MAGNANAKAW** Sangkot sa 16 na malalaking kaso ng korapsyon na nabunyag mula 2001 hanggang 2008. Nagpakasasa sa bilyun-bilyong kaban ng bayan habang ang mamamayan ay lugmok sa kahirapan at gutom.



Meyor, apat na eskort, pinalaya ng BHB

Pinalaya ng Bagong Hukbong Bayan (BHB) noong Mayo 17 bandang alas-5:00 ng hapon si Roberto "Jimmy" Luna Jr., alkalde ng Lingig, Surigao del Sur at kanyang apat na eskort na sina Pfc John Rey Abao at Pfc Arnel Dizon ng Philippine Army, P02 Boy de Castro at P03 Alan Dapitanon ng Lingig Municipal Police Office.

Ang pagpapalaya sa kanila, na ginanap sa Diwata Mountain Range sa hangganan ng Agusan del Sur, Surigao del Sur at Compostela Valley, ay alinsunod sa atas ng Demokratikong Gubyernong Bayan ng Larangang Gerilya 20 sa mga Pulang mandirigma ng Conrado Heredia Command-Bagong Hukbong Bayan (CHC-BHB).

Ang apat ay inaresto ng hukbong bayan sa isang makilos na tsekpoynt na itinayo ng mga Pulang mandirigma ng CHC-BHB noong Mayo 5 habang patungo ang grupo sa Davao City. Nasamsam sa kanila ang maraming armas na may iba't ibang kalibre. Pinalaya si Luna dahil sa kanyang pag-amin at paghingi ng tawad sa mga krimen niya sa bayan at dahil sa makataong kunsiderasyon sa mga apela ng kanilang mga pamilya, kaibigan at iba't ibang indibidwal at grupo.

Umamin ang alkalde sa salang pagtatayo ng pribadong armadong hukbo na kinabibilangan ng mga elemento ng AFP at PNP at mga baryarang *goons*. Ginamit niya ito para sa kanyang mga pampulitika at pang-ekonomyang interes at sa proseso'y may mga nilabag siyang karapatang-tao.

Patuloy ang imbestigasyon ng Hukumang Bayan hinggil sa kanyang kaugnayan sa pagpatay sa dating alkalde ng Lingig na si Amerosin V. Onsing noong 2001 at sa magkapatid na Suazo sa Barangay Union noong 2007; pang-aagaw ng 30 ektaryang lupa ng mga magsasaka sa Barangay Pagbacatan at Dahican Island; malawakang pag-

totroso na labis na nakasira sa kapaligiran; paglabag sa karapatang-tao; at pangungurakot sa kaban ng

bayan.

Samantalang inihinto ang detensyon, magpapatuloy ang rebolusyonaryong ligal at hudisyal na proseso sa mga kaso ni Luna. Sa panig naman ng apat na eskort na bihag ay suspendido ang imbestigasyon sa kanila.

AB

4 na sundalo, inaresto sa ComVal

Inaresto ng mga Pulang mandirigma ng Crucifino Uballas Command ng Bagong Hukbong Bayan noong Mayo 12 sa Barangay Concepcion, Mawab, Compostela Valley sina Cpl. Marcial B. Bawagan, Cpl. Ariel P. Asumo at Cpl. Eduardo Alcala ng Philippine Army at isang elemento ng CAGU na si Victor Pitogo.

Inaresto sila dahil sa kanilang mga kontra-rebolusyonaryong aktibidad at paglabag sa karapatang-tao sa kanilang lugar ng operasyon. Sa katunayan, may kaso sila sa Commission on Human Rights ng reaksyunaryong gubyerno ngunit walang aksyong ginawa ang kinauukulan.

Sa kasalukuyan ay isinasailalim sa imbestigasyon ang apat. Tinitiyak ng BHB-Southern Mindanao sa mga pamilya ng mga bihag na tinatrato sila nang mabuti alinsunod sa Internasyunal na Maka-taong Batas at mga Protokol ng Digma.

Samantala, sa Negros Occidental, nasugatan si Pfc Fred Gustillo nang ambusin ng mga Pulang mandirigma ang isang tim ng 61st IB habang nagpapatrulya sa Sityo Libas, Barangay Basak, Bacolod City noong Mayo 12.

Mga gwardya, dinisarmahan

Dinisarmahan ng BHB ang mga gwardya ng manukan ng despotikong panginoong maylupa na si Miguel Sola sa Sityo Acapulco, Barangay Mahalang sa Himamaylan, Negros Occidental noong Mayo 7. Sa isang pahayag, sinabi ng Leonardo Panaligan Command-BHB na nasamsam sa mga bantay ni Sola ang isang KG9 *machine pistol* na may 60 bala, isang kalibre .38 rebolber at iba pang kagamitang militar. Nakumpiska rin ang 18 manok na pansabong ni Sola.

Sinalakay ng BHB ang manukan dahil sa mga reklamo ng 25 pamilyang nakatira sa paligid ng manukan. Pitong pamilya ang nawalan ng kabuhayan at 18 pamilya ang hindi na pinahihintulatang kumpunihin ang kanilang mga bahay mula nang magtayo ng manukan si Sola sa erya. Sinasaktan at pinagbabantaan din ng mga gwardya ang mga residente sa lugar.

Kasinungalingan ng AFP, pinabulaanan

Mariing pinabulaanan ng Narciso Antazo Aramil Command (NAAC) ng BHB sa Rizal ang paratang ng Armed Forces of the Philippines na inambus ng mga Pulang mandirigma ang mga sundalo ng gubyrerno habang nag-eeskort sila ng PCOS (Precinct Count Optical Scan) *machine* sa Sityo Kinabuan, Barangay Sta. Ines, Tanay, Rizal noong Mayo 12.

Napatay sa ambus na ito si Pfc Roel Escote ng Philippine Army at malubhang nasugatan ang isang hindi pa napangalanang tinylene.

Hindi totoong may papel ang militar sa pagbibigay ng seguridad sa PCOS *machine*, anang NAAC. Sa katunayan, noong Hulyo pa ay nasa erya na ang pinagsanib na pwersa ng 22nd Division Reconnaissance Coy ng 2nd ID at berdugong 16th IB ng Philippine Army. Naglulunsad ang mga ito ng matinding operasyon kung saan hinaharas, tinatakot at pinaparatangnan na mga kasapi ng BHB ang mga magsasaka, settler at katutubong Dumagat. Nagbubunsod ang kanilang mga operasyong militar ng matinding kahirapan sa mga mamamayan sa lugar.

Naganap ang operasyong isnayping noong Mayo 12 sa Sityo Kinabuan na mga limang kilometro ang layo sa pinagdausan ng botohan. Bago ito, nakaalis na ang mga tauhan ng Board of Election Inspectors (BEI) at Smartmatic at dala-dala nila ang mga PCOS *machine* noong umaga ng Mayo 11.

Sa pagsisinungaling magaling ang mga propagandista ng militar para takpan ang kanilang mga kabiguan sa kamay ng rebolusyonaryong kilusan, ani Macario Liwanag, tagapagsalita ng NAAC. **AB**



Ilitaw si Embati, panawagan ng BHB-FSMR

Nanawagan ang Valentin Palamine Regional Operational Command (VPROC) ng Bagong Hukbong Bayan sa Far South Mindanao sa Philippine Army na ilitaw agad si Serafin Tababa Embati, 47, na dinukot ng tatlong operatiba ng 39th IB sa Magsaysay, Davao del Sur noong umaga ng Mayo 7.

Si Embati (Ka Lotlot) ay taga-Barangay Nabundasan, Tulunan, North Cotabato. Kasapi siya ng BHB na matagal nang nagpapahinga dahil sa problema sa kalusugan. Papunta siya sa ospital nang dukutin ng militar sa poblasyon ng Magsaysay.

Maaaring mamatay si Ka Lotlot sa kamay ng mga militar kung hindi agad siya mabibigyan ng karapatang atensyong medikal dahil sa matinding sakit sa bato. Bukod dito, marami ring nakasaksi sa pananakit sa kanya ng mga ahen-teng militar nang harangin ang motorsiklong kanyang sinasakyan. Duguan ang kanyang ulo nang du-

kutin siya ng mga sundalo.

Nananawagan ang VPROC sa militar na galangin ang internasyunal na makataong batas at igawad kay Ka Lotlot ang kanyang mga karapatan.

Samantala, binaril at napatay ng hindi nakilalang mga salarin si Jim Gales, 32, drayber ng Bayan Muna, sa Barangay Little Panay, Panabo City, Davao del Norte nitong Mayo 19, bandang alas-2 ng hapon.

Nagtamo siya ng mahigit sampung tama ng bala sa katawan. Nakasakay siya sa kanyang motorsiklo nang pagbabarilin gamit ang ripleng M16. **AB**

Pamamaslang ng mga sundalo sa Abra, pinagtatakpan

Isang *news blackout* ang ipinataw ng Philippine Army upang pagtakpan ang pamamaslang ng mga sundalo ng Bravo Coy 41st IB ng Philippine Army noong Mayo 1 kay Levi Mamac, 22, residente ng Barangay Tampalac sa bayan ng Lacub, Abra. Ang mga sundalo ay pinamumunuan ni 1Lt. Federico Morales.

Tumatanggi ang Philippine National Police na imbestigahan ang nangyaring insidente sa kabila ng pag-amin umano ng mga sundalo sa krimen. Kaagad na umalis sa erya ang mga sundalo noong Mayo 2.

Nito ring Mayo, ginawang palikuran ng mga tropa ng Charlie Coy, 41st IB ang tangke ng inuming tubig ng Barangay Mataragan sa bayan ng Malibcong. Iginigiit ng mga galit na galit na residente sa mga upisyal ng Philippine Army na parusahan ang sangkot na mga sundalo. Hanggang ngayon ay hindi pa rin sila pinakikinggan ng mga aroganteng upisyal ng militar. **AB**



Welga sa Triumph, binuwag

Marahas na binuwag ng mga gwardya, *goons* at elemento ng PNP ang piketlayn ng Bagong Pagkakaisa ng mga Manggagawa sa Triumph International (BPMTI) noong Mayo 4 sa Taguig City.

Ayon sa Tanggol Kabuhayan Pilipinas, ang pagbuwag ay isinagawa matapos ilabas ng korte ang Temporary Restraining Order (TRO) pabor sa kumpanya ng Triumph na nagdeklarang iligal ang welga. Ipinatupad ito ng *sheriff* ng Pasig City Trial Court kasama ang 100 gwardya ng Food Terminal Incorporated (FTI) na pagmamay-ari ng guberno, mahigit 50 *goons* na nakasuot ng mga *bonnet*, 30 elemento ng PNP-Taguig at mga barangay tanod sa Western Bicutan. Binalaan ng *sheriff* ang mga welgista na dapat buwagin na ang piketlayn sa loob ng limang minuto.

Pagkalipas ng limang minuto ay agad binuwag ng mga gwardya ng FTI ang piketlayn. Sinira nila ang mga tent, istrimer, kagamitan sa kusina, lamesa, mga *water jug* at maging ang mga *sewing machine*

na alternatibong pinagkakakitaan ng mga welgista.

Di pa nasiyahan, pwersahang pinasok ng mga *goons* ang upisina

ng unyon sa likod ng pabrika. Limang lider-manggagawa ang hinaras at pwersahang inilabas sa upisina. Nagtamo sila ng sugat at pilay sa katawan. Noong Mayo 6 naman ay tinangka ng mga pulis na buwagin ang itinayo muling piketlayn habang nakikipag-usap sa maneydsment ang mga manggagawa.

Kaagad binatikos ng mga manggagawa ang ginawang harassment, pananakot at surbeylans sa kanila. Iginiit nila sa pamahalaan na pawalang-bisa ang TRO. Iginiit din nila sa maneydsment na makipag-usap ito sa pamunuan ng unyon at ibigay ang karampatang benepisyo at iba pang kahilingan ng mga manggagawa. Nanawagan din sila ng suporta mula sa mga kapwa manggagawa, taong simbahan at iba pang grupo para magsampa ng kaso sa Swiss OECD National Contract Point laban sa di makatarungang pagtatanggal ng Triumph International sa mga manggagawa nito sa Pilipinas at Thailand.

Sampung buwan nang nakatayo ang piketlayn bilang protesta ng mga manggagawa sa pagtatanggal sa kanila at pagsasara ng kumpanya. AB

Brodkaster sa Kalinga, tinangkang patayin

Nasugatan si Jerome Tabanganay, 44, isang brodkaster sa Radyo ng Bayan sa Bulanao Norte, Kalinga nang pagtangkaan ang kanyang buhay noong umaga ng Mayo 15. Ayon sa National Union of Journalists of the Philippines (NUJP), pinagbabaril ng dalawang lalaking nakasakay sa isang motorsiklo si Tabanganay habang nasa istasyon ng radyo at naghihintay para simulan ang kanyang programa.

Nilapitan at tinanong nang dalawang beses ng isang tao si Tabanganay kung ano ang kanyang pangalan. Kasunod niyon ay apat na beses siyang binaril. Tinamaan siya sa tuhod at sa binti.

Palaging binabatikos ni Tabanganay ang kriminalidad at korupsiyon sa guberno sa kanyang programa. AB

17,000 bagong mag-aaral sa PUP, pinayagang pumasok

MULING nagtagumpay ang sama-samang pagkilos ng mga mag-aaral sa Polytechnic University of the Philippines (PUP) at ng kanilang mga magulang makaraang maobliga ang administrasyon ng PUP na payagang makapag-enrol ang 17,000 bagong estudyante sa darating na pasukan sa Hunyo.

Nauna nang sinabi ng administrasyon ng PUP na 7,000 lamang ang kanilang papayagang mag-enrol sa susunod na pasukan. Subalit dahil sa sama-samang pagkilos at pakikipagdayalogo ng mga estudyante at magulang sa Commission on Higher Education (CHED) ay pinayagan na ring tanggapin ang karagdagang 10,000 na nakapasa sa pagsusulit ng unibersidad.

Bukod dito, nilabanan at nabigo rin ng mga estudyante ang plano ng administrasyon ng PUP na singilin ang papasok na mga estudyante sa College of Technology ng matrikulang nagkakahalaga ng ₱6,000 kada semestre o ₱250 kada yunit.

Plano sana ng administrasyon ng PUP na sapilitang papasukin ang malaking porsyento ng mga bagong estudyante sa College of Technology. Ayon kay Chaser Soriano, tagapangulo ng Central Student Council, "Pinapaasa lamang ng administrasyon ng PUP ang mga estudyanteng nakapasa sa *entrance examination* na makukuha ang gusto nilang kurso. Yun pala ay sapilitang ipakukuha naman ang kurso na mas mataas ang matrikula."

Noong Marso 29, pinawalang-bisa ng Board of Regents ng PUP ang 1,567% na pagtaas ng matrikula bunsod ng matinding kilos-protesta.

Mga maralita nagtagumpay laban sa demolisyon

NAGKAMIT ng tagumpay ang mga maralitang-lunsod sa Quezon City matapos ang kanilang sama-samang pagkilos laban sa demolisyon.

Nagpakita ng lakas ang 700 residente ng Sityo San Roque, Barangay Bagong Pag-asa sa North Avenue, Quezon City matapos magbarikada sa kahabaan ng EDSA noong Mayo 14. Ayon sa Kalipunan ng Damayang Mahihirap (KADAMAY), mariin nilang tinututulan ang proyekto na Quezon City-Central Business District (QC-CBD) na magtataboy sa mahihirap at wawasak sa kanilang mga tirahan. Anito, ang proyektong ito ay hindi naman pakikinabangan ng mga maralita.

Kinatigan ng National Housing Authority (NHA) ang panawagan ng mga residente na ipagpaliban muna ang demolisyon kahit tapos na ang 30 araw na palugit na ibinigay sa mga apektadong residente.

Gayunman, hindi dapat maging kampante ang mga residente dahil anumang oras ay maaaring umatake ang mga tagademolis at maaaring manabotahe sa pamama-

gitan ng panununog sa komunidad, sabi ng KADAMAY. Kailangan din nilang panghawakan ang bari-kada dahil hindi kongkretong solusyon ang ginawang desisyon ng NHA.

Ang QC-CBD ay pangunahing proyekto ni Feliciano Belmonte Jr., alkalde ng Quezon City at ngayo'y nahalal na kinatawan ng ika-apat na distrito ng syudad. Balak niyang gawing sentro ng komersyo ang 250 ektaryang lupain sa sentro ng lunsod.

Mula pa noong 2008 ay mariin nang tinututulan ng koalisyon ng KADAMAY at Confederation for the Unity, Recognition and Advancement of Government Employees (COURAGE) ang QC-CBD. Apektado rito ang 30,000 maralitang pamilya na mawawalan ng tirahan at kabuhayan. Sapilitan ding ililipat o bubuwagin ang ilang upisina at ahensya ng gubyrno na matatagpuan dito, kaya namemeligro ang trabaho ng libu-libong kawani ng gubyrno. Sa ngayon ay nailipat na ang Golden Acres Home for the Aged at maaapektuhan din ang Parks and Wildlife Bureau Nature Center.

Mga pulis, tinambangan ng mga Maoista sa India

MATAGUMPAY ang pinakahuling opensiba ng mga mandirigma ng People's Liberation Guerrilla Army (PLGA) ng Communist Party of India-Maoist nang kanilang tambangan ang sinasakyang bus ng mga nag-ooperasyong pulis sa distrito ng Dantewada, sa estado ng Chhattisgarh, India nitong Mayo 17. Nawasak ang unahan ng bus nang masabugan ito ng eksplosibo.

Ayon sa inisyal na ulat, uma-

bot ang kaswalti sa mahigit 20 upisyal ng pulis at mga tauhan nila. Mas mataas ang bilang ng mga napatay (50) batay sa pagbabalita ng ilang lokal na istasyon ng telebisyon.

Noong Abril 6, nagtamo ng 76 na kaswalti ang mga pwersa ng gubyrno sa mga serye ng panambang na isinagawa ng PLGA sa pagbigong nila sa Operation Green Hunt ng reaksyunaryong gubyrno ng India.

WANTED



GLORIA MACAPAGAL-ARROYO

TUTA NG KANO

Pinahintulutan ang permanenteng presensya ng mahigit 600 tropang Amerikano sa Zamboanga. Pinalaya si Daniel Smith, sundalong Amerikano na nangghasa sa isang Pilipina.

TAKSIL SA BAYAN

Nagpatupad ng pinakamasasahol na maka-imperyalis-tang patakaran ng liberalisasyon, pribatisasyon at deregulasyon na lalong nagpahirap sa mamamayan.

MAMAMATAY-TAO


Nagpatupad ng Oplan Bantay Laya 1 at 2 na nagtulak ng malawakang pamamaslang, pagdukot, tortur at iba pang paglabag sa karapatang-tao.

MANDARAYA

Naluklok sa Malacañang sa pamamagitan ng malawakang pandarayang nabun-yag sa iskandalong "Hello Garci." Walang tigil na nangampanya para baguhin ang konstitusyon para palawigin ang kanyang termino.

MAGNANAKAW

Sangkot sa 16 na malalaking kaso ng korupsiyon na nabun-yag mula 2001 hanggang 2008. Nagpakasasa sa bilyun-bilyong kaban ng bayan habang lugmok sa kahirapan at gutom ang mamamayan.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 10
Mayo 21, 2010
www.philippinerevolution.net

Editoryal

Mga sigaw ng bayan ang isasalubong sa uupong rehimeng Aquino

Lumalabas na ang susunod na mamumuno ng neokolonyal na estado sa Pilipinas ay si Benigno “Noy” Aquino III, batay sa paunang resulta ng nagdaang reaksyunaryong eleksyon.

Oras na umupo si Aquino sa Hunyo 30, determinado ang mamamayang Pilipino na itulak ang paglutas sa mga saligang pampulitika at sosyo-ekonomikong usaping matagal na nilang pinagdurusahan sa ilalim ng bulok na malakolonyal at malapyudal na sistema.

Numero Unong sigaw ng mamamayang Pilipino ang paglilitis at pagpaparusa kay Gloria Arroyo at kanyang mga kasapakat sa lahat ng kanilang krimen habang nasa poder.

Katarungan ang sigaw nila sa napakaraming kaso ng pagnanakaw, kabilang ang ilang bilyong pisong suhol sa proyektong ZTE-National Broadband Network, proyektong IMPSA-Caliraya, proyektong Diosdado Macapagal Boulevard, panggagantso sa Fertilizer Fund at Swine Fund at iba pang kaso ng malakihang pandarambong.

Iginigiit nila ang kataru-

ngan at kabayaran sa napakaraming krimen sa sangkatauhan at paglabag sa karapatang-tao sa pagpapatupad ng Oplan Bantay Laya 1 at 2. Hustisya ang sigaw ng mga tagapagtanggol ng karapatang-tao at mga pamilya, kaibigan at tagasuporta ng higit sanlibong biktima ng ekstrahudisyal na pamamaslang, libu-libo pang iligal na inaresto, tinortyur at ikinulong, dinukot at naging desaparesido;



Mga tampok sa isyung ito...

Ang kumukulong labanang Arroyo-Aquino
PAHINA 3

Meyor, 4 na eskort, pinalaya
PAHINA 7

Ilitaw si Embati --BHB-FSMR
PAHINA 8

Mga instruksyon sa paglilimbag

1. Ang **sinundang dalawang pahina**, na eksaktong kopya ng pahina 1 at 6 maliban sa ilang mas mapusyaw ana mga letra ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com